



*Tandis que Moyse est absent, Israël oubliant Dieu, commet choses insolentes ;  
qui est cause que Moyse rompt les tables de la Loy.*

**V**AND Moyse entendit que le Seigneur vouloit exterminer Israël, il le supplia, disant : Seigneur, que ta fureur ne semble contre ton peuple, auquel tu as fait tant de graces. Je te prie, Seigneur, que les Egyptiens ne disent de toy : Il les a tiré finement d'Egypte pour les occire es Montagnes. Que ton ire donc cesse, & sois doux à appaiser sur l'iniquité de ton peuple, ayant égard aux promesses que jadis tu as fait à leurs peres Abraham, Isaac, & Jacob tes seruiteurs ; & le Seigneur fut appaisé. Or quand Moyse retournant de la Montagne avec les tables de la Loy, se fut approché, il vid le veau d'or & les danfes que faisoient les Israélites autour, dont il se courrouça si asprement, qu'il ietta les tables, & les rompit au pied de la montagne, & prit le veau & le reduit en poudre, qu'il épandit dedans l'eau, & le fit boire aux Israélites. Et Moyse reprit Aaron d'auoir souffert pecher le peuple, lequel s'en excusa : Or moururent pour cette offense vingt-trois mille Israélites, par les mains de ceux de la Tribu de Leui. Et Moyse reprit retournant au Seigneur, le pria pour le peuple, disant : Seigneur, pardonne à Israël, ou efface-moy de ton liure. Auquel le Seigneur répondit, Qui aura peché contre moy, ie l'effaceray de mon liure : Va, & conduis ce peuple où ie t'ay dit.